

ander Gegentheils Argumenta, so er seine meynung zu behaupten in seinen Schrifften führet / satt: vnd gnugsam beantworten vnd widerlegen.

CAP. 4.

**Beweis/ daß beyderseits Evangelische
Von der Person des HERRN Christi / im
Fundament vnd Grund der Seligkeit
einig seyen.**

DAs beyderseits Evangelische in dem Urtheil von der Person vnser HERRN vnd Heylan des Jesu Christi in allen denen Stücken einig seyn / so einem jeden / der da selig werden wil / hiervon zu wissen vnd zu gläuben vonnöhten / hab ich in meiner Friedens Predigt dargehan / in dem ich acht vnterschiedliche Puncten namhaftig gemacht / darinnen wir Evangelische beyderseits einig seynd / In welchen acht Puncten alles das jenige / meines erachtens / bestehet / was von der Person des HERRN Christi vns zu vnser Seligkeit zu wissen vnd zu gläuben nöhtig ist. Die Schlußrede / wenn sie aus der Friedens Predigt formirt wird / lautet also:

Die jenigen / so von der Person des HERRN Christi lehren vnd gläuben / 1. Daß er wahrer GOTT. 2. Ein wahrer / gerechter vnd heiliger Mensch. 3. vnd doch gleichwol eine einige vnzertrennte Person sey. 4. Daß die zwo Naturen in der einen Person Christi vnaußlößlich vnd vnzertrenlich mit einander vereinigt. 5. vnd doch gleichwol in solcher Persönlichen vereinigung vnterscheiden / vnd also vnermischet vnd vnermengt seyn. 6. Daß man vmb vnd von wegen der einigkeit der Person beyder Naturen Eigenschaften der ganzen Person zulegen / vnd sagen könne: Christus des Menschen Sohn / oder der Mensch Christus ist ewig / vñendlich / allenthalben gegenwertig / allwissend / allmächtig &c. Vnd hinwiederumb: GOTTES Sohn / oder Christus wahrer GOTT ist in der Fülle der Zeit entpfangen vnd gebohren worden; GOTT hat gelitten; GOTT ist gestorben / etc. 7. Welche Reden man / da mit